

金文通公集

金文通公集卷之四目錄

吳江金之俊豈凡著

中銓疏草

遵 旨勉留疏

恭謝 天恩疏

聖主恪圖修省疏

遵 旨明白具奏疏

遵 旨回奏疏

遵 旨具疏奏明疏

請復司道互轉疏

金文通公集卷之四

吳江金之俊豈凡著

中銓疏草

遵 旨勉留疏

吏部尚書臣金之俊爲微臣遵

旨勉留。

新命萬難祇受仰祈

合志通公集卷之四
聖鑑別簡賢能以重銓政事該臣奏爲
君恩愈重等事奉

聖旨卿不必求去當遵前旨行該衙門知道欽此臣
叨荷

聖恩諭留再三正黽勉遵

旨聞忽接邸報吏部爲會推官員事奉

聖旨金之俊轉吏部尚書仍帶罰俸一年欽此臣聞
命自天惶悚無地竊念臣衰庸無比久宜幽黜不意
遭逢堯舜

恩遇非常自

皇上親政伊始。卽畀臣中樞重任。甫及二載。又移臣
總憲要地。

皇上之期臣者。可謂極厚。臣之自責者。亦不敢不嚴。
然力不從心。卒之表率無能。澄清寡效。皆臣之
罪也。乃

皇上旣寬其斧鉞。反晉以崇班。舉至重至大之任。付
之極衰極庸之臣。若再不量力冒昧擔承。則臣
先自喪廉耻。其何以抑人情之躁競。司倫物之

鑑衡爲

皇上進賢退不肖。肅吏治而安民生也。臣爲此慄慄危懼。刻不遑寧。不得不據實控辭。伏乞

皇上收回成命。別簡銓臣。容臣仍守憲職。勉竭衰駑。銓政幸甚。微臣幸甚。臣不勝激切待

命之至奉

聖旨。卿老成夙望。特簡銓衡。宜卽祇承新命。不必具辭。該衙門知道。

恭謝 天恩疏

吏部尚書臣金之俊爲恭謝

天恩兼陳愚悃仰祈

聖鑒事該臣奏爲微臣遵

旨勉留等事奉

聖旨卿老成夙望特簡銓衡宜卽低承新命不必具
辭該衙門知道欽此欽遵隨于本月十六日到
任受篆訖竊念臣生平所自久著且是不通賄
賂不徇情面然競競守此猶之今人不爲盜女

子不失身也。僅了本分之事。未盡銓衡之責。若欲克稱銓衡。必使材各配位。而後

國家收器使之益。必使署無曠缺。而後銓法免壅滯之虞。必使常格不盡拘。而後賢豪有振奮之氣。必使資俸不盡破。而後羣情無躍冶之思。此皆臣力所不能也。臣前疏所云慄慄危懼。刻不遑寧者。以是故也。然一息未斷之殘喘。旣叨荷

聖恩寵被無已。自當勉竭駑鈍。不敢偏執立異。亦不敢依阿詭隨。誓與滿漢寮屬諸臣。夙夜在公。冀

圖報稱于萬一。臣老矣。一切恩怨毀譽。總非奄
奄就木之人所暇計也。區區愚悃。敢因恭謝
天恩而併及之。伏乞

聖明垂鑑施行奉

聖旨覽卿奏謝兼抒悃誠知道了該部知道

聖主恪圖修省疏

吏部尚書臣金之俊爲

聖主恪圖修省。微臣毫未盡職。懇乞

皇上速賜罷黜。以儆大小臣工。共圖消弭事。近因霖
霖爲災。奉有

朕當一意修省。祇懼

天戒爾大小臣工。俱宜各盡職業。共圖消弭之

上傳欽此。仰見

皇上如此敬

天罪已爲臣子者宜如何惕勵盡職庶幾

君臣交儆立弭災禍乃衰朽如臣濫叨

聖恩簡畀銓衡重任受事一日卽當盡一日之職業

自閏六月十六日到任以來倏逾半月矣京官

員缺不下七八十員而懸曠未補如故也在外

藩臬道府方面官員原應隨缺隨補不在大選

急選數月推陞之例而懸曠未補如故也竊計

朝廷設一官自有一官之職掌缺一官卽廢一官之

職掌臣所司何事而空言靡當率屬無能以致

在內在外懸曠多官。庶事何由而理。

聖治何日臻。

至尊之宵旰。何時而釋。

上天之垂戒。何從而答也。臣前疏所云。必使署無曠缺。而後銓法免壅滯之虞。竊恐臣力所不能。今果不能矣。卽

聖恩浩蕩。或暫寬臣斧鉞之誅。而臣清夜捫心。亦當羞歎懼歎。伏乞

皇上暴臣罪狀。速賜罷黜。以爲大小臣工。不能仰遵

上傳各盡職業者之戒。臣亦瞑目矣。不勝戰慄待命之至奉

聖旨銓衡重地正慮因仍陋習以致人才壅滯事務廢弛特簡用卿肅清根抵以副期望據奏力所不能今果不能的是何故股肱大臣豈可知而不言正宜悉力擔當指陳情弊不必輒求罷斥况到任僅半月補缺遲誤咎不在卿還速速明白奏來該部知道

遵 旨明白具奏疏

吏部尙書臣金之俊爲遵

旨明白具奏事該臣奏爲

聖旨恪圖修省等事奉

聖旨銓衡重地正慮因仍陋習以致人才壅滯事務
廢弛特簡用卿肅清根抵以副期望據奏力所
不能今果不能的是何故股肱大臣豈可知而
不言正宜悉力擔當指陳情弊不必輒求罷斥
況到任僅半月補缺遲悞咎不在卿還速速明

白奏來該部知道欽此。臣恭繹

天語。期臣以肅清根柢。責臣以悉力擔當。而姑追其
補缺遲悞之罪。臣益感慄無地。敢不遵

旨。明白指奏。仰聽

聖斷。竊照閏六月十五日。適遇

朝期。各部堂上官。爭言司官缺乏。推補萬難再緩。

臣于次日到任。卽查京官缺冊。懸曠甚多。藩臬
道府等官。缺亦不少。隨面語文選司郎中宋學
洙。須要照缺速推。比同堂滿漢諸臣。亦皆以臣

言爲是學洙亦唯唯而退乃日復一日未見說
堂尋復聒催不已則曰番譯清字乏人臣素性
褊急不能從容忍耐恐似此延捱則將來部務
廢閣多端皆自臣之才短望輕不能率屬而始
辜

恩溺職臣罪安逃臣是以夙夜惶懼不得不蚤陳之
君父之前至選臣宋學洙典銓以來有無情弊臣到
任日淺未可懸揣而任意延緩若示人以莫可
誰何之狀臣實不能爲之解也再照楚地時方

用兵經畧輔臣到彼亟需糧餉。藩司一官尤屬萬分緊要。而湖廣左右布政司一時俱缺。又各處按差盡撤。則各省刑名全藉臬司料理。而福建河南並缺按察司。此其關係地方何等重大。而尚不速爲遴補。以仰副

聖明迫切圖治之意。臣之所未遑責人而先以自劾者此也。今內外各員缺已一面協同滿臣力督查補。外敢因遵

青明白速奏而併及之。臣不勝激切惶恐待

命之至奉

聖旨素聞爾老練骨鯁故屢擢要職觀其展布前任
總憲復用爲吏部尙書詳覽恪圖修省一疏有實
心任事欲爲朕整頓之意故令明白回奏冀其盡
言弊習今覽回奏止言一司官延緩部務宋學洙
已被科臣糾劾何須復叅果肯真心爲國必不瞻
顧忌諱仍着金之俊自行回奏該部知道

遵 旨回奏疏

吏部尚書臣金之俊爲遵

旨回奏。謹席藁待罪。靜聽

聖明處分事。該臣奏爲遵

旨明白具奏事。奉

聖旨。素聞爾老練骨鯁。故屢擢要職。觀其展布前任
總憲復用。爲吏部尚書。詳覽格圖。修省一疏。有
實心任事。欲爲朕整頓之意。故令明白回奏。冀
其盡言弊習。今覽回奏。止言一司官延緩部務。

宋學洙已被科臣糾劾何須復叅果肯真心爲國必不瞻顧忌諱仍着金之俊自行回奏該部知道欽此竊惟衰庸負罪之臣蒙

皇上破格恩遇再擢要職展布愚忠指陳弊習此臣分內之事乃煩

天語再詰愧懼欲死臣于衙門弊習原圖隨事體察務求確據漸次入

告到任之初適見內外缺官甚多選臣宋學洙怠緩有據臣竊以爲一銓補而掣肘如此一司官

而延緩如此。將來勢難展布。必至上負。

聖恩。所以一疏自劾。再疏指奏。若臣任事稍久。見聞真確。凡有奸弊。必不敢瞻顧忌諱而不言也。但皇上令臣明白指奏。冀臣盡言弊習。一新銓政。

聖明之待臣者何其厚。望臣者何其切。而臣止言延緩之事。止論被糾之官。殊負。

皇上清問之盛心。臣無所逃罪。謹具實回奏。恭聽皇上處分。臣不勝惶悚待。

命之至奉。

聖旨覽回奏內云原圖隨事體察務求確據漸次入
告等語且自欲展布必不瞻顧忌諱足慰期望
務殫心竭力一新銓政以觀後效不必引咎該
部知道

遵 旨具疏奏明疏

吏部尙書臣金之俊爲遵

旨具疏奏明事。該本部具覆科臣孫伯齡庶務需才
甚急等事一疏奉

聖旨知道了。漢官尙書侍郎旣不畫題其情節。還應
各自具疏奏明。欽此。欽遵。臣謹將不畫題情節
據實爲

皇上陳之。臣前有遵

旨明白具奏一疏。內指懸曠多官未補。係選臣宋學

洙任意延緩。此臣受事以後。屢論而不行。親見而有據者。今部覆科疏。原非宋學洙延期致悞。以爲當日衆議。此則臣未經親聞目見。若隨衆列名。是一人也。而倏言其非。又倏言其是。一事也。而旣已爲遲。又解其不遲。非臣子事。

君以實之道。臣是以不敢瞻顧雷同。畫題列名。謹據實奏明。伏乞

聖慈鑒察施行。奉

聖旨。知道了。內外官員各有職業。夙夜經營。尚虞曠

廢若懸缺不補何以集事安民宋學洙本當議處
因部覆補官延期係當日衆議姑免究以後再有
延緩叅來處治各司官一體嚴飭行該部知道

請復司道互轉疏

吏部尙書臣金之俊爲請復司道互轉之規以
疏壅滯事竊照各省之有守道則布政司官也
巡道則按察司官也然守道之銜不同有左右
布政使銜有叅政銜有叅議銜又有以按察使
銜而兼叅議以副使銜而兼叅議以僉事銜而
管叅議皆管守道事也巡道之銜亦不同有按
察使銜有副使銜有僉事銜又有以左右布政
使銜而兼僉事以叅政銜而兼僉事以叅議銜

而兼僉事皆管巡道事也。至直隸各道皆係兵備道。並無守巡之分。或帶布政司各官銜。或帶按察司各官銜。亦皆管兵備道事也。其銜之大小。總因俸之淺深而定。是以人定銜。非以地方定銜也。惟兩司之官。通融互轉。則一時守巡缺出。不拘銜之大小。便可照缺推補。故署無曠官。官無廢事。案查順治八年七月內。前部臣題爲題明司道缺員事。內開列各道員缺。皆以地方定銜。如分守杭嘉湖道。註定叅政。分巡嘉湖道。

註定僉事之類奉有

俞旨。在案。然其中有窒碍難行。不得不酌議變通者。卽如各省學道。原疏題定副使銜。近日浙江學道張安茂。山西學道孫籀。皆因俸淺。仍帶僉事銜。此亦須用變通之一端也。倘某道定就某銜。一時缺出。俸與銜不相對。勢不得不懸缺以待。豈不曠官廢事。使俸淺俸深之人。均有積薪之歎哉。且不特此也。某地方缺出。便知係何銜。應係何等資俸之人。可一一揣摩而得。滋吏胥之

作奸啓不肖官之趨避更有大不便者查明末
萬曆年間始有不用兼銜之說止就本司通轉
然亦尋苦窒滯不久復用兼銜此往例之昭然
可攷者也應請

聖裁仍復司道互轉之規庶缺出不患乏人而銓法
可免壅滯矣奉

聖旨該部酌議妥確具奏

金文通公集卷之五目錄

吳江金之俊豈凡著

綸扉疏草

隆恩未報疏

君恩海加疏

犬馬戀主疏

仰籲 天恩疏

微臣久病疏

恭謝 天恩賜像疏

遵例考滿疏

驚聞寵命疏

察典屆期疏

君恩無可辭疏

再瀝苦情疏

天膽神奸疏

閩外擔荷非輕疏

微臣苦情疏

遵諭自陳疏

自陳不職疏

遵旨考滿疏

驚聞妻故疏

微臣真老真聾疏

籲天認罪疏

乞休致仕疏

金文通公集卷之五

吳江金之俊豈凡著

綸扉疏草

隆恩未報疏

少師兼太子太師實支正一品俸內翰林國史
院大學士臣金之俊爲

隆恩未報萬一老病已入膏肓。冒罪瀝陳。仰祈

慈鑒俯准休致事。臣糜祿尸位者十有二年於茲。職掌無裨分毫。罪戾有如山積。乃荷

皇上破格優遇。過則曲貸。恩復屢加。言念

高厚。鞠躬盡瘁。期効涓埃。臣之分也。臣之心也。奈以蒲柳之姿。逼于桑榆之景。春來又罹骨肉摧折。傷刺七情。今氣血兩虛。痰火交作。頭目眩暈。肢體酸麻。有旦夕莫支之勢。蒙

皇上憐臣愛臣。過于父母。

特賜醫藥。冀其痊可。

溫辭慰諭至再至三。臣撫心感泣。叩對
天顏。不禁嗚咽。及歸邸寓。又蒙

皇上遣太醫院臣就榻診視。咸謂年老病深。藥石難
療。臣扶掖叩頭嗚咽愈甚。痛思此生無能再竭
犬馬矣。臣之負

皇上實深。夫復何言矣。伏乞

俯矜微臣真老真病。卽

賜放歸。得如同官高爾儼還骨首丘。臣惟有生生世

世矢報

鴻恩于萬一耳。倘幸而一息尙存。則

皇上曲賜餘生。仍當翹首北向。賡祝昇平。而未知奄奄殘喘。得稍延須臾否也。臣伏枕哀鳴。不勝感涕待

命之至。奉

聖旨覽卿奏。深軫朕念。院務殷煩。著用心調理。稍痊卽出供職。該部知道。

君恩洊加疏

少師兼太子太師實支正一品俸內翰林國史院大學士臣金之俊爲

君恩洊加臣心彌悚瀝誠控辭仰祈

鑒允以安分誼事臣呻吟牀褥間准吏部咨文爲欽奉

上諭事內開本月初一日捧接

上諭臣子謨明弼諸雖積久而不言勞國家錫命酬庸必加恩而弗容已少傅兼太子太傅內翰林

弘文院大學士禮部尙書馮銓等居心謹慎制
行端慤政務賴其翼襄恪勤罔懈才猷稱厥委
任寅亮無私宜恩寵之沛加當祇承而勿替馮
銓加少師兼太子太師金之俊加少傅兼太子
太傅劉正宗陳之遴劉昌俱加少保兼太子太
保仍各照舊辦事爾部卽遵諭行欽此臣聞
命自天惶悚無地竊念臣之俊辦事年月雖不後于
馮銓等諸臣而才識謏陋弗稱

委任惟臣爲最卽現歷之官階已濫膺于非分臣

所爲夢寐悚慙惴惴焉負

恩是懼而不遑寧處者此也。況臣以老病不支。正在乞骸候。

旨。前此旣無寸勞足紀。將來又無報稱可期。槩叨寵命。萬難冒承。伏乞

皇上俯鑒惓誠。特允辭免。少傳新銜。以安愚分。則臣雖一旦溘然長逝。亦不至增愧于重泉矣。臣不勝伏枕戰慄之至。奉

聖旨。卿翼襄政務久。著勞績加銜。已有成命。着卽祇

受不必遜辭該部知道

犬馬戀主疏

少師兼太子太師實支正一品俸內翰林國史
院大學士臣金之俊爲犬馬之戀

主甚殷風燭之餘光難待謹冒死再陳籲懇

天恩矜放事該臣于本年四月初二日具有

隆恩難報一疏奉

旨覽卿奏深軫朕念院務殷煩著用心調理稍痊卽
出供職該部知道欽此臣之衰老病狀已盡在
皇上洞照中捧讀之下益深感泣使臣老而筋力未

衰卽衰而受病未篤萬不忍愬然求退亦萬不敢再有控陳負我

皇上無已之深恩其如良藥日進病勢日深胸膈痞結飲食不思手足拘攣寢卧作楚痰嗽中帶有血絲此太醫院臣之目擊而訝爲老症所最忌者豈猶望久延日月哉回念

天恩惟有嗚咽流涕矢報來生斷難以奄奄就木之人耽悞院務益甚微臣之辜

恩而負罪也伏乞

睿慈矜允卽賜放歸臣不勝哀鳴感激之至奉
聖旨卿久襄院務朕倚毗方殷宜祇遵前旨稍痊卽
出供職不必復有引請該部知道

仰籲 天恩疏

少師兼太子太師實支正一品俸內翰林國史院太學士臣金之俊爲冒罪仰籲

天恩臣病實難痊可乞

允休致免悞院務事該臣於四月初九日奏爲犬馬之戀

主甚深等事奉

旨卿久襄院務朕倚毗方殷宜祇遵前旨稍痊卽出供職不必復有引請該部知道欽此臣伏誦

天言彌深感泣遵

旨不敢復請。勉冀稍痊。乃日復一日。藥餌罔間。病勢浸劇。據太醫云。氣血消耗。鬱勞久積。以致中膈滿悶。飲食不思。虛熱眩暈。補泄兩難。非偶中陰陽寒暑之比。可以草木取效。故醫雖極良。藥極對症。猶如以水投石也。竊思

皇上如何勵精圖治。臣子宜如何竭蹶贊襄。而竟以老病垂盡之身。曠悞若此。真死不足贖矣。總之微臣之負我

皇上也。生亦負死。亦負留。亦負去。亦負寤寐反側。無可寬假。獨念臣叨荷

覃恩封典。榮及泉壤。儻未得一上先人墳墓。而遽爾奄終。則臣負

君又負親矣。此臣之所以痛心刺腸。敢冒罪哀鳴於君父之前也。伏乞

天恩。允賜休致。庶政本重地。不致虛懸。耽悞。臣心猶得稍安。而或藉以苟延一息。未可知也。臣不勝惶悚激切待

命之至奉

旨院務殷繁正藉翼襄卿作迷調理稍痊卽出供職
不必再請該部知道

微臣久病疏

少師兼太子太師實支正一品俸內翰林國史
院大學士臣金之俊爲微臣久病曠職糜俸益
難自安懇乞

天恩俯准控辭以稍逭臣罪事前月十七日蒙
皇上欽遣學士麻勒吉到臣病榻間傳宣
天語臣扶掖跪承之餘仰見

君恩隆渥過於天地父母惟有感泣惶懼之不暇又
何忍言去又何敢言去致戀

主之不若犬馬也。但臣偃卧私寓者幾八十日矣。寤寐反側。恨不蹶然而起。再覲

天顏。以快瞻仰。而無如臣命不辰。愁與病積。良藥不離于口。痞結轉塞于胸。飲食罔進。肱肉盡削。動履彌艱。漸成痿廢。安望有痊可之日哉。竊念庸朽如臣。卽朝夕入直。黽勉辦事。尙虞伴食叢愆。而況困頓牀褥之間。虛糜大官之俸。中心負疚。有頃刻難以卽安者。伏乞

勅部住支臣俸。照前同官高爾儼例。庶可稍寬臣心。

也。至如

皇上求治甚殷。院務所關甚繁且重。而懸缺妨賢有
虛

皇上需人佐理之盛心。則微臣戀

主之忱。終難掩誤國之罪。此猶臣所旁皇病榻而慄
慄危懼。恐死亦未能瞑目耳。謹伏枕叩

闕。披瀝字字血誠。統希

慈鑒。臣不勝惶悚待

命之至奉

旨卿還加意調理稍痊卽入院辦事不必辭俸該部知道

恭謝 天恩賜像疏

少師兼太子太師實支正一品俸內翰林國史院大學士臣金之俊爲恭謝

天恩賜像事。臣質本庸陋。齒復衰頽。每顧影懷慙。靡竭踵頂。恒撫心增惕。謬寄股肱。頃以老病疴羸。荷蒙

欽賜湯藥。方伏枕而益加憔悴。乃從

天而彌被寵光

恩。照鬚眉。繪師奪化工之巧。澤宣丹碧。內使函

帝賚之隆。伏念臣之俊初。無汗馬微勞。妄竊凌烟之
異數。木偶輝煌。更乏調羹寸績。濫叨肖像之
殊榮。夢魂祇懼。雖微臣視息之促。猶如石火電光。
而

皇上華袞之頒。何啻霞明錦燦。敢不子孫什襲。永矢
結。叩謹扶掖望。

闕叩頭。仍力疾草疏恭

謝。至于沉疴難療。尚祈

慈鑒矜全。臣不勝頂戴感激之至。奉

旨覽卿奏謝知道了該部知道

遵例考滿疏

少師兼太子太師實支正一品俸內翰林國史院大學士臣金之俊爲遵例考滿乞

勅部嚴加考核以肅官方事臣之俊於順治元年五月內蒙

恩錄用二年七月內由兵部右侍郎調吏部右侍郎五年七月內奉

上傳陞工部尙書六年十月內加太子太保八年二月內奉

旨調兵部八月內奉

旨加少保兼太子太保實支正一品俸九年六月內

准刑部咨爲奉

旨發審事。罰俸九箇月。十年正月內奉

旨仍以少保兼太子太保補都察院左都御史。十年

四月內爲會議任珍一案。削去官銜二級。罰俸

一年。十年閏六月內。陞吏部尙書。仍帶罰俸一

年。十一年內爲房之騏一案。罰俸一年。調用十

一年正月內爲好生關

聖德之大等事。於補任日。罰俸三箇月。二月初六日。上傳着以原加銜級補內翰林國史院大學士。仍帶罰俸二年六月內恭上。

皇太后徽號。恩詔免罰俸。十二年四月內加少傅兼太子太傅。自八年正月起扣至十三年二月終止。計歷任五年零四箇月。除降級罰俸月日外。共實歷從一品俸三年零二箇月。例應考滿竊念在

廷諸漢臣中。尸位最久者。無如臣蒙

恩最深者無如臣。負罪至重者亦無如臣。雖
皇上覆載宏慈。未加譴責。而微臣早夜循省。時切悚

惶。茲當考滿之期。莫追黜幽之典。伏乞

勅部重加處分。以爲人臣衰庸尸素。溺職辜
恩者之戒。臣不勝股慄待

命之至奉

旨。卿久叅機務。茂著清勤。覽奏例應考滿。知道了。吏
部察例議奏

驚聞 寵命疏

少師兼太子太師實支正一品俸內翰林國史院大學士臣金之俊爲驚聞

寵命。瀝悃控辭。仰祈

睿鑑。俯准辭免。加銜廕子。以安臣心事。臣辦事衙門。接吏部覆臣遵例考滿一疏。奉

旨。金之俊着加少師兼太子太師。賜羊酒廕一子。入監讀書。欽此。除

欽賜羊酒例應祇承外。竊念加銜廕子。

朝廷隆渥之典。所以勸有功。酬成勞也。乃至庸至衰。無足比數之臣。無尺寸之功。足紀無犬馬之勞。可念。祇以尸位日久。槩叨

隆渥殊恩。真有夢魂跼踖。時刻難安者。况此何等時也。

皇上方遇灾引咎。虔事修省。微臣忝列政地。調燮無狀。宜首從策免故事。今

皇上旣寬其譴罰。反賜以

寵榮。顧影捫心。萬難冒昧。祇受此實由衷之積愆。

非矯飾以沽名伏乞

俯鑒微誠收回加銜廕子之

成命則臣心庶得稍安而臣罪亦免日深矣臣不勝
惶悚待

命之至奉

旨卿贊襄機務著有成勞加恩原屬懿典不必遜辭
吏部知道

察典屆期疏

少師兼太子太師實支正一品俸內翰林國史院大學士臣金之俊爲察典屆期遵例自陳不職懇

賜嚴加處分以清政本以肅臣工事竊照京官六年考察之典舉行伊始該吏部等衙門題奉

欽依令三品以上自陳去留請自

上裁所以澄清百寮維新吏治甚鉅典也臣鄙瑣衰庸濫叨峻秩不職之甚未有過于臣者敢不據

金匱要略卷之三
實自陳首聽

乾斷處分乎。臣之俊由太子太保工部尙書于順治八年閏二月內奉

旨調兵部尙書本年八月內奉

旨加少保兼太子太保實支正一品俸十年正月內奉

旨仍以少保兼太子太保補都察院左都御史本年四月內爲會議任珍一案奉

旨削去官銜二級罰俸一年本年閏六月內陞吏部

尙書仍帶罰俸一年。本年十一月內爲房之騏一案奉

旨着罰俸一年調用。十一年正月內爲好生關

聖德之大事。于補任日罰俸三箇月。本年二月內奉
上傳着以原加銜級補內翰林國史院大學士。仍帶
罰俸十二年四月內奉

上傳加少傳兼太子太傳。十三年四月內爲遵例考
滿事吏部覆奉

旨加少師兼太子太師。賜羊酒廕一子入監讀書。欽

此臣早夜撫心自揣我

皇上親政以來六年之內四陟院部寸長靡効積過

萬端凡在

廷諸臣中惟臣之糜祿最久蒙

恩爲最深。負罪爲最重。若不

嚴加處分。未足以儆官方而昭

國憲。至于臣年六十有四。氣血全耗。兩耳俱聾。照

老疾之明條。從黜幽之寬典。此又非臣所敢望也。總之微臣種種不職。有心難昧。萬非循例套

陳者比伏乞

皇上特賜嚴譴以爲大臣溺職辜

恩之戒。臣不勝悚息待

命之至。奉

旨。卿輔弼重臣。誠慎端介。匡贊若勞。倚任方殷。豈可
引例求退。宜益殫猷爲禪成。治理該部院知道。

君恩無可辭疏

少師兼太子太師實支正一品俸內翰林國史
院大學士臣金之俊爲

君恩無可辭之日。臣心有萬苦之私。冒昧瀝陳。仰祈
慈鑑。俯准暫假事。臣于順治十年十二月內接家信。
父母塋地。被水衝圯。棺槨漂露。驚痛欲絕。隨于
十一年二月初四日。具有冒瀝下情。仰祈

聖鑑。准假遷葬一疏。奉

旨覽。卿奏雖屬至情。但新膺簡命。着祇遵辦事。勿再

陳請該部知道。欽此。臣祇遵

成命。入院辦事。一面令臣男就塋內衝圯處所。權宜
增土。暫時補苴。已荏苒四年矣。上之不能殫力
抒猷報

君恩于萬一。下之弗獲封塋展掃。慰親魄于九泉。不
忠不孝。積罪彌深。是以

皇天降罰。十年之內。連喪五子。又一子一媳。並殞京
邸。望七衰年。舉目雙櫬。不禁肝腸碎裂。但念臣
自元年五月初二日至今。叨沐

天恩莫可殫述。臣次子世漢近又蒙

皇上給授蝦職。臣父子受

國厚恩。殞身難報。何敢遽以私情痛苦。引年乞休。謹遵會典開載三年考滿。方許具奏給假之例。冒罪泣陳。伏乞

天恩准賜暫假。仍照養病例作缺俾臣趁此一息尚存。將父母低窪塋地。改卜安厝。併攜兒媳雙櫬。乘便入土。則臣舉家存歿啣結矣。事畢之後。卽當匍匐

闕庭再覲

天顏以表犬馬戀主之心。雖老死弗忘也。臣無任激

切悚惶待

命之至奉

旨覽卿奏情詞懇切。但幾務殷繁。方資贊理。着勉留
供職。不必遽以假請。該部知道。

再瀝苦情疏

少師兼太子太師實支正一品俸內翰林國史
院大學士臣金之俊爲冒昧再瀝苦情。籲懇
天恩俯准暫假事。臣于順治十四年八月內具有
君恩無可辭之日。臣心有萬苦之私等事一疏。爲父
母瑩地衝圯。兒媳雙櫬未歸。積苦填胸。懇請暫
假奉

旨覽卿奏情詞懇切。但幾務殷繁。方資贊理。着勉留
供職。不必遽以假請。該部知道。欽此。臣跪誦

天語俯鑑情詞臣心旣蒙

矜察臣身何敢求去。惟有感激圖報。勉竭衰駑而
已。不意微臣老命孤苦。今歲五月間。又喪一及
笄之女。斗大室中。舉目三櫬。肝腸痛裂。更倍往
時。雖飲淚含悲。抑情辦事。然神識昏瞶于

君恩未酬毫末。而臣罪轉積山丘。倘一旦溘然長逝。
則兩親之雙魄。終無寧宇。子女之旅魂。飄泊誰
依。臣所以夢寐及側。中夜長號。不得不冒死瀆
鳴于

君父之前也。伏乞

皇上憫念微臣年衰命苦。准

賜暫假。俾臣得稍偷餘息。仰安親魄。俯慰子魂。當
生生世世。誓竭犬馬于勿替矣。事畢之日。卽匍

匍趨

朝。臣一日未死。一日未敢忽然于

君恩也。奉

旨覽卿奏具見至情。但閣務殷繁。方資佐理。不必遽
以假請。該部知道。

天膽神奸疏

少師兼太子太師實支正一品俸內翰林國史院大學士臣金之俊爲天膽神奸詭冒可駭。特據實剖明。仰祈

睿鑒。併靜聽

皇上處分事。本月初八日。臣在直辦事。接有江西巡撫張朝璘一本。爲盤獲假官假旗。出示招兵。隱匿東人。請

旨究擬等事。見在候

旨聞。臣聞之驚駭欲絕。因思本內所謂金震者。不惟臣通族中無其人。卽通縣同姓異族中。亦無其人。憶去年五六月內。聞其在臣鄉附近地方。冒稱臣姪。出沒不常。踪跡詭秘。當被臣男世濂訪知。卽呈控江寧撫臣張中元處。遍行躡緝。竟爾免脫無踪。已經立案緝究。不意天網不漏。乃敗露于江西省也。據稱正紅旗恩拔貢生。從來旗下無拔貢。亦無又恩貢。又拔貢之理。又稱係庚辰進士金和嫡弟。臣家並無金和。焉有金震。又

稱係臣薦送王固山委用。臣與固山王國光。從
無隻字相通。亦無片言相及。何由而薦。種種說
鬼說夢。業經江西各官審鞫明白。無容臣贅。但
臣自通籍至今四十餘年。兢兢小心株守。時懷
臨淵履冰之懼。凡所以戒訓子弟。約束親族童
僕者。未嘗敢一刻懈縱。乃有益世神奸金震。竟
于青天白日之下。肆行狐假。真目無三尺者矣。
應請

皇上大奮乾斷。立置重典。以爲假冒大臣子弟者之

戒併爲的係臣子弟親族倚托招搖者之戒。至于臣之素行苦心未能孚信遠邇而爲魑魅魍魎之所影竊響附是皆臣德薄望輕有以致之也。謹席藁待罪靜聽

皇上處分。臣不勝悚息待

命之至奉

旨金震情罪另自有旨卿不必引咎該部知道

闔外擔荷非輕疏

少師兼太子太師實支正一品俸內翰林國史
院大學士臣金之俊爲闔外之擔荷非輕行間
之將士宜鼓仰祈

乾斷。稍寬文網。佇收武功事。洪惟我

太祖

太宗功德高深。創造丕基。我

皇上仁威遐布。光昭大業。然不可謂非師武臣力也。
自古安不忘危。文事武備。必須兼資。目今要荒

雖入版圖。餘孽猶多。伏莽韜弓。戢矢正未可期。當寇逼門庭。欲得其效死勿去之力。必平居無事。預結其親上死長之心。近來在外大小將領。勇怯貪廉。固自不等。若一概吹毛索瘢。苛求太過。則死綏之氣沮喪極矣。甚至挺而走險。如張弘德。其貽害可勝言哉。以臣愚見。武官之賢否。但當論其封疆有無失事。賊寇能否扞禦。小民有無虐害。其餘居官立身。偶有微疵。似宜稍從寬宥。庶武夫咸知感奮。而緩急不患無濟矣。至

于軍政大典。自不可廢。但寇氛未蕩。責其用命。方殷。倘有指摘。又未便臨敵。易將。應請

上裁。或俟江浙事平之後。定期舉行。明核功罪。確分黜陟。則虛聲不可掩敗。曖昧難以沒功。而軍政之考察。庶爲允當矣。臣感時觸事。中夜徬徨。故不識忌諱。冒進狂言。伏乞

睿鑑。密斷施行。

順治十六年七月 日奉

旨兵部議奏

微臣苦情疏

少師兼太子太師實支正一品俸內翰林國史院大學士臣金之俊爲微臣苦情久蒙

慈鑑敢援同官速去速來之例籲

恩暫假稍紓臣衷萬苦事臣于順治十五年八月內具有冒昧再瀝苦情籲懇

天恩俯准暫假一疏奉

旨覽卿奏具見至情但閣務殷繁方資佐理不必遽以假請該部知道欽此臣遵

旨抑情辦事受

恩日重積過日深者復逾年于茲矣

恩重則不忍再請過深則益不敢再請而無奈老景
滋迫苦緒轉增今年臣鄉初夏大水臣父母塋
地復被水淹雖增土補苴於外苦積水暗滲於
內夢魂牽繞痛徹心髓又臣妻嚴氏在家年六
十有五頃接家書陡患危痢兩目失明無望再
睹臣面尙冀一聞臣聲以了一生夫婦之緣臣
不禁潛然涕隕中宵哽咽也若夫一兒一媳一

女之三櫬並羈萬邸。晨雨宵風。皆臣所時刻不
堪回首者已。臣同官劉正宗傳以漸。前各以苦
情相繼乞假。俱蒙

天恩俞允。准令速去。速來。臣之苦情。比二臣較爲迫
切。臣離家已十載。比二臣又爲更久。故敢冒昧
援例泣陳于

君父之前。懇徵

鴻慈垂憫。俾臣得偷數月餘晷。仰安雙親體魄。俯慰
子女旅魂。且失明病妻。或聞臣聲而再甦。有機

則存歿啣

恩非復世世犬馬能報矣。速去速來有同官二臣之
成例在。臣雖家鄉稍遠。衰邁獨甚。斷不敢逗遛
愆期。自取罪戾也。臣不勝激切惶懼待

命之至奉

旨覽卿奏具悉。至情准暫假速往。速來入直辦事。該
部知道

遵 諭自陳疏

少師兼太子太師實支正一品俸內翰林國史院大學士臣金之俊爲遵

諭自陳不職仰祈

乾斷嚴加處分以肅官方以新化理事臣於去年九月內荷蒙

天恩特准暫假已於冬至日抵家隨星夜鳩工修葺先人塋墓併料理兒女埋葬等事冀本年六月終諸務完畢便恪遵

皇上面諭欽限匍匐就道不敢逗遛里門乃于本年
二月二十六日接邸報爲欽奉

上諭事

上諭諭吏部國家政務委任庶官必大小臣工咸得
其人乃可共襄化理在京各衙門宜加澄敘以
勵官常大學士尙書俱着自陳侍郎以下俱着
開列職名候朕親行甄別爾部卽傳諭行特諭
欽此欽遵臣仰惟

皇上臨御以來勤思化理宵旰靡寧卽堯兢舜業亦

不是過而

皇上猶念海宇尙未乂安。民生尙未樂業。下罪已之詔。竭

祭告之誠。臣在籍捧讀。

諭旨。慙悚無地。夢寐不能卽安。竊以至治未臻。皆臣等奉職無狀。而

皇上如此勵精圖治。獨爲引咎。臣等之罪。真莫可贖矣。茲奉有大學士尙書俱着自陳之

上諭。臣敢不臚列罪狀。爲

皇上陳之臣自順治元年五月初二日竊祿至今歷任部院者十年積辜實有萬狀。廁名綸扉者七載。溺職非止一端。清夜捫心。臣之受

恩比諸臣爲最深。臣之負

恩較諸臣爲獨甚。至于學疎不嫻典故。識暗不審時幾。膽怯力綿。不能克艱任鉅。尤屬過愆之小者也。今澄汰官方。維新化理。則

嚴加處分。當自臣始。不容以暫假在籍之身。稍追一日斧鑕也。臣謹席藁待罪。恭聽

乾斷不勝恐懼待

命之至奉

旨卿清勤端練佐理有年勞績素著倚任方殷着遵
前旨速來供職不必求罷吏部知道

自陳不職疏

少師兼太子太師實支正一品俸內翰林國史
院大學士臣金之俊爲遵

諭自陳不職仰祈

乾斷嚴譴以彰維新之化事。臣于本年五月內具有
額

天認罪一疏。在寓靜候部議處分間。于本月二十一
日接邸報爲欽奉

上諭事

云

云

欽此欽遵。

臣仰見

皇上維新化理。務期澄肅官方。正任官惟賢才。左右惟其人。千古圖治要法也。恭繹近見在京部院各衙門官員。有稱職有不稱職之

天語。諸臣中不稱職者。臣實爲首。固已昭然無逃宸鑑矣。辜負

先皇帝之大恩。一十八載。歷任各部院之罪狀。百千萬端。無論

國法不容屢寬。卽臣清夜亦難自恕。而况真老真聾。一籌莫展。久玷機密重地。何以肅羣寮而光

新政也。伏乞

皇上亟賜乾斷。嚴加譴黜。至該部議覆。臣認罪前疏。又當聽另案處分者也。臣不勝惶懼待

命之至。奉

旨。卿清慎端練。効力有年。勞績素著。倚任方殷。着益殫力供職。不必求罷。吏部知道。

遵 旨考滿疏

少師兼太子太師實友正一品俸內翰林國史
院大學士臣金之俊爲

旨考滿乞

勅部嚴加核議以警官方。以肅政本事。該臣于順治
十三年四月內具有遵例考滿一疏。內開自八
年正月。起。扣至十三年二月終止。計歷任五年
零二箇月。除降級罰俸月日外。共實歷從一品
俸三年零二箇月。例應考滿等情。臣本自暴三

年罪狀恭請

乾斷處分何期

天恩浩蕩免其譴責反荷

隆施撫心非分寤寐慚惶乃自十三年三月內起
扣至十六年二月終止連閏共實歷俸三年零
一箇月又該一品三年考滿年復一年迄無涓
埃之報稱罪又添罪彌負

高厚之鴻恩正擬再行具疏考滿靜聽黜幽間因十
六年閏三月內爲檢舉認罪事罰俸六箇月又

本年五月內爲遵

旨議處事降二級罰俸一年嗣雖旋即蒙

恩。槩免臣等降罰。適臣又荷

睿慈。准假還籍。是以未敢遽請考滿。今事竣入直辦事。循省舊例。難容久稽。謹補續請考。伏乞

宸斷。勅部嚴加處分。以爲大臣尸位最久。負恩最深者之戒。此非考功八法之輕條。足蔽前後六年之罪案者也。臣不勝惶悚股慄行

命之至奉

旨卿端亮清勤久叅機務覽奏俸應再行考滿知道
了應得恩典察例具奏吏部知道

驚聞妻故疏

少師兼太子太師實支正一品俸內翰林國史
院大學士臣金之俊爲微臣驚聞妻故痛瀝苦
情仰籲

天恩俯准暫假事。臣于順治十六年九月內具有微
臣苦情一疏。內稱臣妻嚴氏年六十有五在家
陡患痢疾。兩目失明。無望再睹。臣面尙冀一聞
臣聲。以了一生夫婦之緣。敢援同官速往速來
之例。籲請暫假等因。蒙

世祖章皇帝垂憫至情。特往暫假回籍。臣妻因臣到家。果聞臣聲。而危症漸愈。一日復明。舉家頂戴天恩。莫知所報。臣不敢稍違。

先皇帝速往速來之欽限。隨于十七年九月內。飛騎馳還。入直辦事。乃

國恩未報。萬一臣罪轉積丘山。本年五月內。因江寧歲叅錢糧一案。臣具疏籲

天認罪。正束身屏息靜候部議間。忽于本月初六日。接家書。臣妻仍患痢症。于八月十三日病故。痛

念

先皇帝如天厚恩。俾臣妻瞽目復明而後歿。今歿亦瞑目矣。惟是老年夫婦。未得一訣。痛徹心髓。臣不敢以席藁候議之身。遽請休致。哀懇

皇上慈憫。准臣暫假數月。拊妻棺一慟。旋爲營置葬地。亦不敢視其入土。遷延里門。當依限馳還。待罪

闕廷。則存歿銜

恩。更非生生世世之犬馬能報也。臣不勝恐懼迫切

待

命之至奉

古覽卿奏情詞懇切特准假往該部知道

微臣真老真聾疏

少師兼太子太師實支正一品俸內翰林國史
院大學士臣金之俊爲微臣真老真聾衰庸誤
國懇祈

睿鑑。亟賜黜放。以儆官常。別簡賢能以光新政事。臣
自順治元年五月內竊祿至今。歷涉部院十年。
濫竽綸扉八載。長靡尺寸。過積丘山。旣無耆舊
汗馬之勞勲。又乏廷臣謀猷之補裨。徒以尸位
年久。游冒崇階。清夜撫心。夢魂羞恥。臣曾屢疏

自列罪狀。謬蒙

先皇帝曲賜優容。泣思

高厚殊恩。此生難報。方擬瀝血陳情。誓竭來世犬馬。
不意

先皇帝遽爾賓天。臣痛腸寸斷。恨未能捐微軀以追殉。
益不欲延殘息於人間矣。今遭逢

皇上以天曹膺哲。維新代理正宜任賢使能。澄敘流
品。臣之謗陋無比。首當甄汰。而况年垂七十。兩
耳全聾。卽附耳高聲。十不聞二。且神散志昏。今

日頓忘昨事。抵暮失記朝言。機密重地。豈容奄
奄待盡之人。塞耳瞪目。覩顏參預其間也。伏乞
皇上大奮乾斷。重加譴黜。以爲大臣受高爵厚祿。負
恩悞國者之戒。倘獲徼
膺慈及於寬政。追其

斧鉞。姑准休致。則臣當生生世世。矢靡踵頂以報
已。臣不勝惶悚股慄待

命之至奉

旨卿清勤端慎練達事務經

先帝簡拔任用効力有年勞績素著閣務殷繁正資佐
理仍着勉力供職以副倚毗之意不必遽請休致

吏部知道

額 天認罪疏

少師兼太子太師實支正一品俸內翰林國史院大學士臣金之俊爲額

天認罪事。臣辦事衙門。接江寧巡撫朱國治陳明錢糧拖欠之由等事一疏。奉

旨。該部核議具奏冊留覽。欽此。准撫臣送部清冊。開列長洲縣欠糧各紳花名。內有金魁一戶。註明臣子金世漢欠三釐五毫。又有同名金魁一戶。註明內閣侄金子政欠八分一釐二毫。統候該

部遵

旨核議外。若微臣之罪。則更有無容稍貸者矣。臣嘗
思舉家叨受

國恩。值此軍需孔亟。自應爭先輸稅。爲他姓倡。豈容
拖欠絲毫干

大法而負

大恩。反自臣始。故先於順治十四五六年間。預呈
前後各撫按。求其行縣清察金姓花名。每年完
欠錢糧細數。嚴行追比。疊蒙批准在案。不意臣

子見任蝦職尙有三釐五毫之欠。臣旣未能早督全完。族姪生員金子政復冒立官戶致有八分一釐二毫之欠。臣又不能覺察指叅。數年來預呈撫按一片趨事苦心。今俱托之空言矣。

大法已干。

大恩已負矣。臣之罪其尚可贖乎。惟有束身伏辜。請皇上褫臣之職。仍置臣於法。爲大臣不能教訓子姪體

國急公者之戒。庶積玩知警。而軍需有賴矣。臣不

勝惶悚激切待

命之至奉

旨該部議奏

乞休致仕疏

少師兼太子太師實支正一品俸內翰林國史院大學士臣金之俊爲臣年七十報

國無能懇乞

天恩憐准休致事。臣于順治十八年九月內。具有微臣驚聞妻故一疏奉

旨覽卿奏情詞懇切特准假往該部知道欽此。欽遵。臣隨于九月二十五日

陛辭出都。十一月二十七日到家。始得拊妻棺一

慟了一生夫婦之緣言念

君恩感痛欲絕臣前疏本請暫假因叨

先皇帝一十八年之豢養未獲稍報涓埃又蒙我

皇上今日破格之優隆尙思勉竭犬馬故不敢苟圖

自便遽行乞休奈臣年已七十衰病日侵向患

耳聾今併患目昏向苦血枯燥結今又苦脾虛

泄瀉雖暫延視息于人世不過石火電光豈堪

久廁跡于綸扉罔顧鐘鳴漏盡况值

龍飛元年百度維新機務重地尤宜肅清而臣名未

除仕籍仍玷非所以肅官方而光新政也。倘臣
一旦溘然長逝。則溺職負

恩之大罪。既無逃于生前。而戀位無恥之醜名復彌
彰于身後矣。臣之所甚懼也。用是力疾繕疏。遣
家人喬德賁投通司。照例封進。伏乞

天恩垂憫。賜臣骸骨。姑准休致。則生生世世子孫
孫當矢銜結于無窮矣。爲此具本。謹具奏。

聞臣不勝悚慄待

命之至。

吏部覆奏奉

旨金之俊清勤練達歷任院部効力有年勞績素著
既經引年乞休賜袍服一套着以原官致仕廕一
子入監讀書地方如有關係國家利弊重大事情
仍許陳奏

金文通公集卷之六目錄

吳江金之俊豈凡著

山中奏草

恭謝 天恩疏

遵 旨陳奏疏

遵 諭陳奏疏

遵 旨陳奏疏

金文通公集

卷之六

恭陳賀悃疏

金文通公集卷之六

吳江金之俊登凡著

山中奏草

恭謝 天恩疏

予告太傅兼太子太師吏部尙書中和殿內秘書院
太學士加一級臣金之俊爲恭謝

天恩兼瀝辭悃仰祈

睿鑒。俯安。臣心事。臣蒙

恩里。居于本年九月初二日。接吏部咨文一道。內開
考功清吏司案呈。該本部覆臣奏。臣年七十。報
國無能等事。一疏。于康熙元年八月初一日奉

旨。金之俊。清勤練達。歷任院部。効力有年。勞績素著。
既經引年乞休。賜袍服一套。着以原官致仕。廕
一子入監讀書。地方如有關係國家利弊重大
事情。仍許陳奏。欽此。臣卽恭設香案。望

闕叩頭謝。

恩除

欽賜袍服。例應祇承外。竊念廷臣中。尸位最久者。無如臣受。

恩最深者。無如臣。積過最多者。亦無如臣。茲值引年之日。宜從黜幽之條。卽褫臣之職。削臣之廕。未足贖臣罪萬一。乃蒙

天恩浩蕩。旣准臣原官致仕。已屬逾涯。復廕臣一子。尤驚非分。此臣所夢寐靡寧。萬萬不敢冒昧祇受者也。伏乞

皇上俯鑒微誠。收回廕子之

成命。則臣倘得偷生一日。亦庶得安心一日矣。至于
地方利弊。有關係

國家重大事情者。臣雖身伏田野。寧忍心忘

國家。然地方自有文武大吏。當知無不言。言無不
盡。亦非誼列編氓之退休老臣。所宜越俎與聞
者也。敢因控辭

恩廕渥典而併及之。總之回想

君恩。種種溢格。令人感極涕零。無論今生莫報。卽生

生世世亦未知所以報矣謹齋沐繕疏

北向九叩遣家人孫榮賁投通政司照例封進統
希

皇上慈鑒爲此具本謹具奏

聞臣不勝惶悚待

命之至奉

旨覽卿奏謝知道了廕子入監陳奏地方利弊已有
成命不必控辭該部知道

遵 旨陳奏疏

予告太傅兼太子太師吏部尚書中和殿內秘書院
大學士加一級臣金之俊爲遵

旨陳奏仰祈

睿鑑事。臣于本年九月內。奏爲恭謝

天恩等事一疏。奉

旨覽卿奏謝知道了。廕子入監。陳奏地方利弊。已有

成命。不必控辭。該部知道。欽此。除望

闕叩頭恭謝外。竊思

君恩渥被無已而微臣沒齒罔報恐

先皇帝在天之靈必加殛罰臣所以自聞

命來早夜憂惶惴惴焉刻不寧處今日擊地方大事

實關

國家利弊臣何敢畏罪緘默而不遵

旨據實陳奏也

國家財賦重地莫過東南而藩司郡邑等官動干

錢糧考成接踵去任者亦莫甚于東南臣不暇

遠指繁稱卽據蘇州一府而言一二年間府縣

各官更換如流。久則葺年。近止數月。豈一授蘇州之缺。皆催科政拙之徒耶。臣愚以爲官之更換愈速。則胥吏之作奸愈甚。錢糧頭緒愈多。混淆前後承接。愈多誘卸。新舊侵那。愈多漏卮。不肖者固不惜身名。卽賢者亦無由奮勵。將見官日更。賦日絀。而民生亦日以朘削。吏治亦日以隳壞。其爲

國家之弊也。可勝言哉。總之

國計民生。本當並重重。

國計必須嚴考成。凡應降應革。一毫不容寬假。重民生。必須察治行。卽帶降帶革。仍可策令自新。伏乞

皇上俯採臣言。

勅部詳加察議。倘有治行卓越。操守無疵。見在考成降革之列者。免其實降實革。姑准戴罪。課其後效。在

朝廷旣用罰以寓勸。在各官自補過以圖功。吏治振舉。則考成亦不屬具文。弊除利興。莫過于是。倘

臣不從

國家起見。稍存毫私。沽名市恩。願甘

斧鑕。臣祇因風燭殘齡。朝不保暮。懼一旦溘焉長逝。而欲言無及。則臣之違

旨。負恩。生生世世。莫能贖矣。故敢冒昧直陳。統候宸鑑。裁奪。臣不勝惶悚待

命之至奉

旨。該部議奏

遵 諭陳奏疏

予告太傅兼太子太師吏部尙書中和殿內秘書院
大學士加一級臣金之俊爲遵

諭陳奏仰祈

宸鑑事臣蒙

恩休致已經四載一息尙存未嘗一息不以

君父榮懷也頃接邸報恭讀本年二月二十九日因

星變求言之

上諭欲與內外大小臣工洗心滌慮各抒所見共圖

消弭。臣始而憂。憂變不虛生。繼而喜且賀。賀
皇上之遇災而懼。反災爲祥也。蓋

天心仁愛。故示異以垂戒。仁愛之尤至。故屢示異以
嚴切垂戒。今

皇上旣克謹天戒。增修德政。則災卽是祥矣。臣向奉
有仍許陳奏之

旨。茲又值

皇上求言若渴之時。尙敢愛垂歿之餘年。而不思竭
忠圖報乎。臣竊謂弭異之大端有三。春生秋殺。

天之常道也。

朝廷法天以明刑。則肅殺定有其候。凡犯監候。斬絞之歿罪。非決不待時者。仍照律秋決。姑緩罪人。須臾之歿。以答

上帝好生之心。至于一應獄情。皆宜確引本律。此亦弭異之一端也。民足君足。古今常理也。

朝廷養民以裕國。則考成尙須通融。酌免有司之實降實革。以責其久任成功。分別糧里之欠少欠多。以鼓其好義終事。勿令官苦傳舍。民愁敲

朴此亦弭異之一端也。紀綱法度國之常憲也。朝廷乘乾以秉憲。則威福豈容下移。凡光棍挾私叩

閣。因而陵轢官府。僭擬威福。一時紀綱法度爲之掃地者。斷宜嚴禁痛懲。此亦弭異之一端也。總之天人一理。感應甚速。人復其常。則

天自消其異矣。臣一念朴誠。不識忌諱。謹遵旨陳奏伏候

皇上採擇施行。不勝惶悚待

命之至。

康熙四年三月十七日具奏四月初八日奉

旨覽卿奏知道了該部知道

遵 旨陳奏疏

予告太傅兼太子太師吏部尚書中和殿內秘書院
大學士加一級臣金之俊爲遵

旨陳奏仰祈

宸鑑事臣蒙

恩休致苟延殘齡已七十有四無一日不沐

君父之恩卽無一日敢忘圖報之念也本年二月初

三四等日驚傳杭州省城暨嘉湖兩府數百萬
姓聞督臣趙廷臣疏請解任葬母搶地呼天號

泣罷市既苦

君門遠於萬里。又恐一旦頓失怙恃。士不安於庠。農不安於畝。商不安於旅。賈不安於市。俱皇皇然有莫必其性命之憂。督臣平日得民之深。蓋可知也。臣思兩浙係濱海重地。所在伏莽。餘孽尙爾未靖。目下投誠多人。正需安插。况浙閩唇齒相倚。值今春汛屆期。此何等時也。閩督新推未任。浙督又將賦歸。沿海一帶重大事情。頭緒繁多。雖賴有賢能撫臣。似難以一身兼攝。而輿

情之愛戀如斯。亦亟宜解慰而輯寧之。目下情
形。督臣似難一日去任。臣愚以爲宜暫留督臣。
仍照舊抑情任事。俟閩督蒞任。相與共圖善後。
務保萬全。俟料理有緒。然後乞

皇上俯從其請。庶

國事子情。可以兩全而無悞也。臣仰見

皇上加意東南要地。倚重莫先於督臣。而兩浙民心
若此。地方多事。又若此。督臣之去留。實關

國家重大事情。臣若畏罪緘默。循省仍許陳奏之

旨負

恩甚矣。謹齋沐繕疏遣家人金鶯賁投通政司。照例封進伏候。

睿慈鑒察施行。爲此具本。謹具奏。

謝世不勝惶悚待

命之至。

康熙五年二月初九日具奏三月十四日奉

旨趙廷臣前因葬母准其暫假兩月遷葬已有旨了

該部知道

恭陳賀悃疏

予告太傅兼太子太師吏部尙書中和殿內秘書院
大學士加一級臣金之俊爲恭陳賀悃仰祈

睿鑒事。臣蒙

恩歸老餘息尙存。本年九月二十六日隨蘇州府見
任大小各官後恭接

皇上親政詔書于府堂上開讀跪聽訖萬姓雷歡老
臣雀躍雖伏草莽敢後颺言恭惟

皇上

睿德天鍾。

英姿神授。

年方鼎盛。早勤昧爽。以臨朝。

運撫盈成。恒期甲夜。以視事。謳歌于今六載。聲教

已訖九圍。矧

五位當陽。離照煥中天之治。而

萬幾在御。乾元昭行健之功。慶曆服之無疆。徵太平

之有象。臣崦嵫殘喘。報

國未能。但犬馬微忱。感

恩靡盡。伏願

皇上敬

天無逸。典學惟勤。監于

太祖

太宗之成憲。不愆不忘。率由

世祖皇帝之舊章。惟精惟一。親賢納諫。舜智以明目達

聰而益神。薄歛省刑。堯仁以民安物阜而愈普。

江海之澄清立睹。唐虞之盛治攸臻。已臣不勝

踴躍忭舞之至。爲此具本。謹具奏稱賀以

聞。

康熙六年九月二十七日具奉十月初五日奉
旨覽卿奏賀知道了該部知道

跋

余自幼從先君子與諸長者遊
見其吮筆濡墨以韻語相唱和
心竊好之間取唐人詩極意揣摩
或一語偶合輒沾沾自喜大
都以少陵爲宗傍及諸家迨晚

年精力衰耗遂矢口而出庶幾年
彷彿香山以爲詩如是足矣歲
壬寅春

息齋太傳出珥筆閒吟示余燈
下偕友龍潘子快讀數過相與
勇躍謂必如是而後可稱詩之

正鵠也蓋其言莊麗典雅溫厚
和平五七言律入少陵之髓七
言絕及古詩歌行得香山之神
又悉自胷襟流出毫無斧鑿別
具爐錘正始之音於今再睹且
少陵刻不忘君香山時思退步

惟其有之是以似之殆斯編之
謂乎瑩追愧嚮者未嘗知詩敢
曰能詩天假數年就其中沉酣
翫味衣珠斯在安事他求朕則
繇知而能斷自今日始矣

皆

康熙元年孟春小弟毛瑩謹書